

Aruba Scholarship Foundation:

A Reparti \$10,700 na beca pa un semester na cuater estudiante



ORANJESTAD - Diamars atardi den e cantina di Garage Cordia, Aruba Scholarship Foundation a entrega checknan di beca pa un semester na studiantenan di kende nan aplicacion a ricibi recomendacion di e "Selection Committee" y a haya e aprobacion unanime di directiva. E aña aki cuatro estudiante ta e

feliz recipientenan, tres di nan ta ripiti di aña pasa. E unico nobo ta Roan Held cu ta den su prome aña na Valencia College na Orlando y ta pensa di specialisa den mercadeo. E studiantenan cu ta ripiti ta: Godelieve Olibrice (Master's - Hospitality Management- Florida International University), Paola Adames

(Bachelor's - Hospitality Management - Rosen College di UCF) y Margret Flores (Bachelor's - Psychology - University of South Florida). Como cu Godelieve y Roan ta asistiendo Summer school nan no tabata presente. Margret Flores falta un semester p'e caba na FSU y e ta pensa sigui pa su Master's otro aña

sea na Hulanda of na Merca mes. Recientemente Godelieve tabata tema di un articulo den corantnan local como el a ricibi "straight A's" den su prome semester den e "Masters Program". Tur cuatro selecciona ta studiantenan ehemplar, y Aruba Scholarship Foundation ta contento y orguyoso di por

yuda nan haci realidad nan soño. E studiantenan mester a firma un acuerdo cu ASF cu nan lo bolbe Aruba despues di caba nan estudio den exterior. Clyde Harms a elogia e "Selection Committee" pa e bon trabou cu nan a haci. Selección di e candidatonan ta un responsabilidad masha delicado cu tin consecuencia serio riba bida di cada estudiante.

E "Selection Committee" e aña aki tabata consisti di Brian Marchena y Thaïs Nierop y bou e liderazgo di Etley Lasten. Clyde mes a fungi como asesor. Na final di e ceremonia di presentacion, Clyde Harms a lesa un remarca prepara di antemano, pa anuncia cu el a retira di Aruba Scholarship Foundation pa haci luga pa hende mas jong. E ta bay skirbi historia di ASF y por lo pronto e lo keda como asesor ora cu ta necesario. Pa duna bo comentario riba e articulo aki, por comunica cu clydeharms@yahoo.com. □